



UPA 2014/173.1
8. maj 2014
kvk

Issittoq atominik sakkulianik atuiffiunngitsoq pillugu politikkimik suliniuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.
(Inuit Ataqatigiit Inatsisartuni gruppianni ilaasortat)

Oqaaseqaaterput manna allartissavara Naalakkersuisut siunnersuummut akissuteqaataanni oqaaseqatigiit isumaqatiglluinnakkakka marluk issuarlugit, tassalu:

”Issittup eqqissisimaffiunissaa qularnaatsuunissaalu Naalakkersuisut isumaqatigaat”, aamma
”Issittumi atominik sakkulianik atuisoqarnissaa Naalakkersuisunit isumaqatigineqanngilaq”,

oqaaseqatigiit taakku nanginnerat taava soorlu imaassagaluartoq, ”taamaattumik Inuit Ataqatigiit siunnersuutaat tapersorsorparput, Naalakkersuisullu issittup atominik sakkulianik atuiffiunnginnissaa sulissutiginiarpaat.” Kisianni ajuusaarnaraluartumik Naalakkersuisut siunnersuummut akerliunerarput pivusorsiuunnginnerarlugu. Tassunga atatillugu oqaatigisariaqarpoq pivusooq tassaammat nunarsuatta ilaa tassalu 56%-ia ullumikkut atominik sakkussianik inissiiffigeqqusaananilu atuiffigeqqusaanngimmat – tassalu maani nunatsinni aammalu DK-mi naalakkersuisut pivusorsioortuunnginneraalluni naliliinerat pivusorsioortuunersut apeqqutaaneruvoq.

Nunarsuatsinni sakkussianik ikilisaanissaaq ukiorpassuannngortuni suliniutaavoq, pingaartumillu sakkussiat qinngornernik ulorianartunik akullit nungusarneqarnissaat siammartinneqannginnissaallu naalagaaffiit pissaanilissuillu akornanni ilungersuutigineqarsimavoq – aamma Issittumi. Pingaaruteqarpoq issittup angallaffiugaluttuinaarnerani nunap, immap silaannaallu atominik sakkussianik angallassiffiunnginnissaa anguniassallugu, tassami assersuutigalugu 1968-imi timmisartorsuup Pittuffiup avataani nakkarnerata kingorna pisimasut avaanngunartut misigeqqikkusunngilagut.

Inuit Ataqatigiinniit siunnersuuterput nunarsuatta eqqissisimaffiunissaanik isumannaatsuunissaanillu suliniuteqarnerup nanginneratut isigineqassaaq. Uagut nammineq nunatsinni misilittakkavut tassalu Thulemi sakkussianik inissiisarsimanerit tamatumalu nassataanik ajornartorsiutit aporaannerillu pilersinneqartut aallaavigalugit, soorlu pissusissamisuuassagaluartoq Nunatta namminersulersimasup taamatut nuanninngitsunik pisoqaqqinnginnissaa sulissutigiluarpagu.

Inatsisartuni partiit allat Naalakkersuisullu ilungersortumik kajumissaarpagut siunnersuuterput taperseqqullugu, nunanullu allanut attaveqarnerput issittumilu nunat akornanni qaffasissumik inissisimanerput atoqqullugu siunertamik pitsaasumik siuarsaanermut – tamanna pisariaqarmat taamaaliornissamullu piffissaammat. Naalakkersuinikkut siunertaqarneq taamallaat ullormiit ullormut anguneqarsinnaasunik siunertalersornermut killeqartariaqanngilaq.

Inuit Ataqatigiinniit siunnersuuterput ullumikkut itigartinneqassappat tamanna aamma Inatsisartut novembarip 14-anni 1984 aalajangersaanerannik atorunnaarsitsinerussaaq taamanimi Inatsisartut isumaqatigiillutik oqaaseqaateqarput Nunarput atominik sakkussiaqarfiussanngitsoq, ulluni sorsuffiunngitsuni ullunilu sorsuffiusuni.